

草堂嗣響
利



草堂詞響卷三目錄

長調上

滿江紅

九十三字
十一首

淒涼犯

九十三字

惜秋華

九十三字

鳳凰臺上憶吹簫

九十四字

六么令

九十五字

雪梅香

九十五字

滿庭芳

九十五字
四首

水調歌頭

九十五字
十一首

夢揚州

九十五字

玉簫涼

九十六字

天香

九十六字

倦尋芳

九十六字

長亭怨慢

九十七字
三首

八聲甘州

九十七字
二首

聲聲慢

九十七字

瑤臺第一層

九十七字

慶清朝慢 九十七字

留客住 九十七字

夏初臨 九十七字

晝夜樂 九十八字

孤鸞 九十八字

揚州慢 九十八字

雲仙引 九十八字

雙雙燕 九十八字

催雪 九十九字

倦尋芳又一體 九十九字

玲瓏四犯 九十九字

燕山亭 九十九字

陌上花 九十九字

無悶 九十九字

聒龍謠 九十九字

玉蝴蝶 九十九字

金菊對芙蓉 九十九字

御帶花 九十九字

垂楊 九十九字

高陽臺 百字

琵琶仙 百字

念奴嬌 百字

東風第一枝 百字

渡江雲 百字

彩雲歸 百字

龍山會 百字

曲遊春 百一字

珍珠簾 百一字

錦堂春慢 百一字

木蘭花慢 百一字

秋水 百一字

水龍吟 百二字

憶舊遊 百二字

齊天樂 百二字

石州慢 百二字

瑤花 百二字

氏州第一 百二字

南浦 百二字

春從天上來 百二字

春雲怨 百三字

雨霖鈴 百三字

雙聲子 百三字

草堂嗣響卷三

錫山顧 彩天石編輯

孔傳鐸振路

關里 全定

孔傳鋹西銘

長調上

滿江紅 感舊

吳梅村

滿目江山。何處是。石城東冶。記舊日。新亭高會。人人王謝。風靜旌旗瓜步壘。月明鼓吹秦淮夜。筭北軍。天輕隔長江。飛來也。暮雨急。寒潮打。蒼鼠竄。宮門瓦。看鷄鳴埭口。射鵰盤馬。庾信哀時惟涕淚。登高却向西風灑。問

開皇將相復何人。亡陳者。

又

詩酒溪山足笑傲。終焉而已。回首處。亂雲殘葉。幾編青史。昔日兒童俱老大。同時賓客今亡矣。看道傍。爭羨錦衣郎。曾如此。遭際盛聲名起。跨燕許。追蘇李。苟不知一事。吾之深恥。年少卽今何所得。孝廉聞一當知幾。論功名。消得幾多才。偶然耳。

又暮春柳

毛稗黃

一片斜陽映幾處。河橋晴色。問當日。征衫別淚。爲誰沾濕。暮雨瀟瀟魂已斷。白雲冉冉愁無極。減風流。不似鬪

腰肢。初相識。章臺路。春狼籍。灞水岸。烟斜織。驀紅塵無數。馬蹄輪跡。飛絮影隨風上下。離人望斷江南北。怕重來。剩有亂蟬嘶。千條碧。

又西湖感舊

董蒼水

繡甸春濃。酒帘外。青山無數。還記得。桃花滿院。劉郎前度。紅燭畫橈臨別酒。碧簫殘雨相思路。看韶光。零落斷橋邊。斜陽暮。無限景。烟中樹。無限意。風前絮。對澄湖如鏡。玉人何處。艷影尙疑花欲笑。離情只有鶯能訴。歎西陵。松柏自年年。風流誤。

又

顧梁汾

愛酒能詩。記舊日。疎狂風調。曾相識。星前擲菓。紫衣年
少。匹馬衫輕。愁獨往。雙鸞鏡掩。虛同笑。又誰啣。錦字帝
城飛。三青鳥。憑寄語。歸期杳。剛又被。無情惱。奈玉容
難駐。緇塵易老。露葉如啼楊柳陌。霜華欲被芙蓉沼。悵
丹青。都是夢中看。今番覺。

又 洞庭月

孔振路

八月潮平。窮千里。水天一色。姜白石。波心冷蕩。此情堪
憶。銀漢斜拖。蜃氣外。金盤吐出。鮫宮側。望中青。一點是
君山。纔盈尺。星斗近。俱堪摘。鷗鷺狎。如相識。向瀟湘
十二。浮家泛宅。面面清暉。隣画舫。悠悠遠響。歸漁笛。擬

乘槎。直上斗牛邊。今何夕。

又 塞上咏葦

朱錫鬯

絕塞淒清。又誰把。秋聲留住。斜陽外。寒沙搖漾。亂山無
主。瑟瑟乍驚心。欲碎。茫茫不啻愁如許。伴西窓。燈火坐
黃昏。蕭蕭語。催一陣。茅簷雨。攪一片。霜林杵。爲伊想
遍了。別離情緒。酒渴三更人散後。月明千里鴻飛處。夢
滄江。添箇釣魚船。風吹去。

又

孔西銘

夢杳香篝。怕重見。千層烟樹。爭忍問。香消簾捲。而今是
去。病骨料來同恨死。瘦軀拚得和愁住。覺心中。沒有一

絲兒非離緒。楚江濶。應無據。吳山小。知何處。刺連宵
寂寞。一床風雨。寄恨天邊鴻不達。埋憂地下。蛩難訴。歎
離魂。意馬挾奔馳。關山路。

又

王雲岡

偃仰蕭然。何必問。升沉今昔。就現在。佳時領畧。誰人能
得。愛月祇愁雲黯淡。護花只怕風狼籍。更早涼。親飼野
魚苗。清閑極。堪一笑。金門策。莫浪說。搏風力。但靜中
冷看。虛齋生白。曾幾何時爲少壯。畧無多日成追憶。計
從今。一味不思量。機心息。

又 庾樓月

顧天石

如此良宵。爭不向。庾樓高會。豪興處。捲簾滅燭。引觴沉
醉。賦客而今雖已矣。江山豈得長無謂。把清光。吸入酒
盃中。吞空翠。障不住。西風袂。流不盡。神州淚。放襟懷
喝斷。海天字彙。銀漢俄從北戶轉。冰輪又向西山墜。笑
元規。一段汗人塵。曾爲累。

又 洞庭月

天合平湖。看上下。茫無邊際。凌汗漫。扁舟容與。浪圓風
細。曠矣月舒。良夜彩。悲哉秋作。人間氣。幻波間。萬萬道
金蛇。迎船戲。十二幅。瀟湘意。一萬里。蒼梧地。筭吾身
渺渺。此中萍寄。帝子魂歸環珮冷。鮫人淚滴芙蓉膩。唱

一聲水調古歌頭。驚鷗睡。

淒涼犯

子韶歸自江上

沈融谷

飛花兩槳催人去。計程千里將半。犀浦雪濤。片帆何處。
汀迷沙暗。閒鷗夢斷。認楊柳難尋深岸。正無邊撩風絲
雨。應把春衫換。孤客真愁絕。望極空江。別離曾慣。暮
雲似漆。坐篷窻一燈零亂。如此淒涼甚。東閣猿啼鶴怨。
問歸舟。遊情幾許莫更倦。

惜秋華

孔振路

四壁蛩吟。恨無端惹起。傷秋懷抱。槭槭淒淒。漸看葉疎
林表。行雲本是無心出。隔斷青天殘照。將疎雨。淒然灑
遍。青鞋黃帽。江上蒹葭老。想東籬瘦損。舊時風調。孤
城畔。砧杵急。又催愁到。明知離緒難禁。况天涯亂山縈
繞。眠了。聽一宵秋聲多少。

鳳凰臺上憶吹簫

顧天石

迎得秋來。送將夏去。幾朝催老紅顏。看蛸蟻上樹。化作
鳴蟬。一樣雲峯起。漸蕭索似鯉魚斑。江頭好。遠山疊翠。
入有無間。潺湲無窮潦水。浸禾隴瓜畦。莫辨桑田。悵
西流大火。歲事荒殘。秋則從他到也。奈逸興不似從前。
成虛設。銀河鵲橋。瓜果堆盤。

六么令

孔振路

女墻低小。一半遮脩竹。春烟淨。梳細柳。好鳥鳴金谷。正是芳菲時候也。好事相徵逐。銅環雙叩。高樓隔水。外有王孫往來速。須行樂耳。何故日日愁蛾感。誰信錦陣香圍。也有人幽獨。脉脉閒情一縷。擬倩遊絲續。隨風漂泊。惹郎襟袖。正在闌干第三曲。

雪梅香

登魯侯望父臺

顧天石

曠千載。魯侯於此望西周。想晨昏念切。憑高處幾度凝眸。當日雲山只如此。到今麋鹿不曾遊。聖踪賢跡。豈關人弔古悲秋。悠悠念隱桓。以後蕭條。剩此荒坏。宿莽墟烟。闕宮雲物都收。料鳧岫難遮遠目。指泗濱空識歸

舟。都付與登臨倦客。落帽科頭。

滿庭芳

汴梁客舍同馮蓼菴夜坐出梁溪閨秀求愁人詩示余凄然有感

陳其年

馮衍長愁。陳思不樂。相逢同客東京。鳥啼花落。惆悵可憐生。無忌館今何處。河聲怒攙着砧聲。秋宵永。幾橪粉月。晒得綠窻晴。鶯鶯聞尙在。詩人老去。一倍含情。且開箱驗取。錦字縱橫。料爾銀鈎未寫。檀箋上珠淚先盈。休腸斷。青衫紅粉。一樣是飄零。

又 塘灣閣夜

龍二爲

練影初浮。冰輪正湧。露梢微咽新蛸。驚鴉匝樹。數點落

星橋欵乃一聲輕去。鏡中度。劈破銀潮。凭欄聽。水晶簾
畔。離恨寄秦簫。無聊嗟宦海。飄流未定。松檜頻嘲。有
眉山當日。曾掛詩瓢。玉宇清涼無汗。空辜負。甲帳烟綃。
何年得。六龍鞭起。汗漫碧天遙。

又 潼關

曹實菴

太華垂旒。黃河噴雪。咸秦百二重城。危樓千尺。刁斗靜
無聲。落日紅旗半捲。秋風急。牧馬悲鳴。閒憑吊。與亡滿
眼。衰草漢諸陵。泥丸封未得。漁陽鞞鼓。響入華清。早
平安烽火。不到西京。自古王公設險。終難恃。帶礪之形。
何年月。剗平斥埃。如掌看春耕。

又 壯士吟

顧天石

看劍高談。絕纓長笑。人生不樂如何。漢書下酒。一石未
云多。羯鼓鼕鼕自擊。其聲壯。鐵馬凋戈。衝冠髮。少年送
我。落月度渾河。明駝馳紫塞。肘懸金印。帳擁青蛾。笑
封侯定遠。華鬢空皤。散盡黃金白壁。三千士。痛飲狂歌。
功名在。燕然勒石。風雨不消磨。

水調歌頭

祝余曼翁壽

何省齋

歲月忽焉邁。荏苒竟忘天。非君記我生日。我漸不知年。
我已不婚不宦。君乃獨清獨醒。易地則皆然。休作晨星
歎。落落尙人間。靜如鷗。瘦如鶴。冷如蟬。笑看退筆如

帝破硯可如田。我以蹉跎當壽。君以安閑當富。何必計
虧全。我正歛碁手。君莫聳吟肩。

又 鹿脯和陳其年大可兄

毛鶴舫

玉饌幾曾設。得鹿少年場。誰邀今夕。在客拍手問穹蒼。
北斗貪饒無賴。故意沉吟應劫。飽食再端詳。悔不揭其
柄。夜夜挹霞漿。魯公字。傳乞脯。恐荒唐。古來墨蹟。只
須換酒莫留藏。生小不知臨帖。一任東塗西抹。五指結
如薑。更借麻姑爪。麟脯擘同嘗。

又

曹顧菴

螺黛凝烟髻。鳴綠膩春塘。相逢恰是麗景。橫笛噴清商。

素質休教粉污。自有天然標格。淡掃壽陽粧。措措猩裙
艷。盼盼燕泥香。芹芽白。蘭芽紫。蟻歸航。舊時舞榭何
處。畫壁女蘿荒。草沒銀箏院落。苔長鳳鞵花徑。佳節倍
思量。一百五寒食。七十二鴛鴦。

又 生日喜雪

杜茶村

洗足山中夜。高枕鼓趺眠。長宵清寂無夢。只此便通仙。
豈料披衣刮目。瞥見高深一白。使我發狂顛。今日是何
日。今歲是何年。新春後。殘臘半。上元邊。無人知我出
世。元屬古堯天。坐見飛瓊積玉。但願千齡萬歲。凍合此
山川。何處生戎馬。無地起烽烟。

又輓萊陽姜如農先生。先生前朝以建言予杖
遣戍宣州。會變未達戍所。僦居吳門三十年。癸
丑疾革。遺命必葬我敬亭山之麓。聞者悲之。私
謚曰貞毅先生。

陳其年

東海黃門老。疾革話悲酸。呼兒吾骨累汝。霜剪一燈寒。
休返田橫島上。何用要離塚側。莫恤道途艱。憶奉重華
命。遣戍敬亭山。三十載。憐弱水。幾回乾。鐵衣生既未
着。鬼亦戍其間。此地層崖杳嶂。正接蔣陵鍾阜。紫氣湧
千盤。若有人兮在。竦劍守危關。

又

陸雲士

久有買山志。未辦買山錢。安得青蚨數萬。肩負向林泉。

中買數間茅屋。左買千竿修竹。右買半畦田。下買碧流
水。上買碧雲天。天映水。水遶屋。屋生烟。烟籠芳樹。樹
頭好鳥語綿蠻。不願金甌卜相。不願推輪拜將。只願此
身閒。寄語靈臺使。莫奏客星懸。

又送陳六謙之任安邑

曹寶菴

琴鶴渺然去。爲政足風流。何意鳳鸞漂泊。百里借君侯。
三晉雲山北向。咫尺二陵風雨。納納動離愁。雪片大如
手。匹馬過蘆溝。門霜戟。人繡虎。筆銀鈎。禹都吟眺。淋
漓墨瀋。筆峰頭。試到野狐泉上。入望塩花似霧。天寶物
華收。欲問段干木。舊跡杳難求。

又題岳陽樓圖

成容若

落日與湖水。終古岳陽城。登臨半是遷客。歷歷數題名。
欲問遺踪何處。但見微波木葉。幾簇打魚罾。多少別離
恨。哀雁下前汀。忽宜雨。旋宜月。更宜晴。人間無數金
碧。未許著空明。淡墨生綃譜就。待倩橫拖一筆。帶出九
疑青。彷彿瀟湘夜。鼓瑟舊精靈。

又題扇畫美人

顧天石

憶昨故園夢。春雨過西山。黃鳥啼落花片。流水韻潺潺。
中有荒蕪亭子。絕世蛾眉二八。惆悵獨憑欄。不記此何
處。疑是武陵間。魂魄動。歸路杳。與闌珊。嗚嗚械械。斷
雲殘雨送將還。何意扇頭重覩。添樹梧桐蒼翠。人叩小
屏環。心事訴不盡。愁絕兩眉灣。

又鬼火

遠浦暮烟外。何處一燈微。不是漁父敲石。收網下魚磯。
不是漂零估客。夜久蓬窓未睡。燒葉補征衣。不是隔溪
女。篝火弄寒機。漸明滅。乍遠近。忽依稀。風吹不散。有
時移過荻洲西。遙想江天戰後。多少征魂無主。淚眼帶
霜啼。欲渡不能渡。化作碧燐飛。

又驟雨

密雨灑林壑。勢急欲翻盆。空中倒挂瀑布。劈作萬條銀。

滄海蛟龍戰鬪。三峽雷霆吼怒。八表色同昏。疑是鴻濛
世。不復辨乾坤。雨亦快。晴亦快。散網緼。濕雲迸碎。閃
爍紫電似水紋。漏出西山落照。倒射半規虹影。涼意滿
松筠。推上一輪月。玉宇淨如新。

夢揚州

蘧菴先生久客維揚寄懷

陳其年

蜀岡頭。記狂夫舊日曾遊。薄倖樊川。一夢三年青樓。紅
橋上藕絲菱蔓。當時費盡凝眸。平陳業。烟花記。可憐逝
水悠悠。老矣先生何求。也雨檝烟篷。北謁諸侯。鶴髮
開元。老淚銅仙爭流。紅衣落盡西風起。怕隋堤最不宜
秋。隱隱見一江燈火。人隔揚州。

玉簫涼

孔振路

禾黍送涼。看衰草古堤。又下斜陽。馬嘶驕玉勒。正立飲
離觴。登車人憔悴。衣袖上猶帶餘香。言不盡。有萬般深
意。九轉迴腸。思量新歡未幾。幽恨頓生。一句珍重難
忘。前途烟水濶。便雨渺雲茫。昨宵輕憐痛惜。甘苦味兩
下同嘗。誰信道。這相思滋味尤長。

天香 龍涎香

宋牧仲

島嶼蟠沙。烟波抱月。潛虬吐沫如許。歛自綉宮。滴同鮫
淚。萬里浮槎誰取。博山小試。似快剪雲英一縷。裊裊紫
簾拂座。悵望海天何處。最憐空閨獨炷。對氤氳燕梁

鷺戶漫倚銀篝。聽盡夜深梅雨。此際相思不淺。歎荀令風流頓非故。素被餘熏纏綿未去。

倦尋芳

孔西銘

薄寒輕煖。乍雨還晴。釀恨天氣。中酒懷人。不識是何滋味。小軒中。閒庭畔。驀然變作傷春地。沈東陽。漸腰肢瘦了。箇人知未。舊歡處。歌情舞態俱廢。鎖窓是誰深閉。鵲語無憑。儘意被他調戲。拭取兩眶離別淚。寫成半幅相思字。冷清清。倚空樓。倩誰傳寄。

長亭怨慢

黃以永

總有這別離今日。悔殺當初。慢憐輕惜。執手依依。人前

有淚總難滴。歌殘離席。回首處。山重疊。夾道是垂楊。折不盡萬絲輕碧。望極。漸斜陽影裏。綠樹芳塵人隔。當真去也。竟成了恁般拚得。但黯黯半晌凝眸。悄不覺春城入夕。料此夜山頭。定有不歸魂魄。

又

看堤草青青如許。湖上人家。十風五雨。柳外層樓。捲簾終日對飛絮。此情難訴。惟有恨更無語。恨也可消閒。向恨裏尋些閒趣。烟樹。料斜陽那答。應是落紅院宇。謝娘嬌小。想未解登臨心緒。又恐是忒煞多愁。怕魂斷杜鵑啼處。把無限離愁。盡上江淹別賦。

又雁

朱錫鬯

結多少悲秋儔侶。特地年年。北風吹度。紫塞門孤。金河月冷。恨難訴。渚烟汀樹。也只戀江南住。隨意落平沙。巧排作參差筍柱。別浦。慣驚疑不定。應怯敗荷疎雨。一繩雲杪。看字字懸針垂露。漸歌斜無力。低飄。正目送碧羅天暮。寫不了相思。又蘸涼波飛去。

八聲甘州

過鄒平謁伏生祠

孔振路

滿咸陽烈炬正焚書。先生似冥鴻。抱黃農虞夏。叢殘典冊。長嘯清風。楚漢縱橫過了。鶴髮已蒙茸。不向桃源隱。只在寰中。他日遺經口授。與吾家藏壁。字字相同。笑

空疎陸賈。草創叔孫通。數千年遺風綿邈。剩荒祠落日斷垣紅。有多少行人錯問。何代仙翁。

又

高澹人

看楊花陣陣撲空階。真個又春歸。漸櫻桃紅熟。杏兒青小。樹影添肥。向午蜂愁蝶怨。冉冉謝芳菲。惟有梁間燕。軟語低飛。爲甚留春不住。覺香輪玉勒。瞬息都非。最牽情牽恨。天氣困人時。想粧樓簾垂日末。早輕搖紈扇。換羅衣。料得我故園花事。開到薔薇。

聲聲慢

戲用疊字仿李易安

孔西銘

愁愁悶悶。風風雨雨。孤孤冷冷。惻惻。燕燕鶯鶯。忽忽南

南北北。多多少少恨恨。但年年堆堆積積。情種種種。淚盈盈。苦苦甜甜戚戚。院院深深寂寂。人悄悄。去去來來。密密。絮絮喁喁。語語言言的的。休休生生死死。願常常戀戀惜惜。信杳杳。恨夜夜啾啾唧唧。

瑤臺第一層

立秋

孔西銘

耳畔琤然飄一葉。秋生金井床。碧池紅沼。蘋汀蓼渚。水弄微涼。深深庭院。未審何來。哽咽啼螿。但屈指數。新春到此。一半年光。凋傷。蓮衣片片。中心依約有空房。欹斜翠蓋。如何覆得多少鴛鴦。低低囑團扇。幸無暑不用頻揚。五銖裳。漸和香和粉。疊入瑤箱。

慶清朝慢

楓葉

顧天石

老翠先凋。嫩黃初綻。園林昨夜西風。誰將露清霜白。點染江楓。人道紅于春樹。萸春那得許多紅。平蕪外。村村掩映。似火燒空。濃一片。淡一片。縱畫也畫不出淡和濃。想應醇醪數斗。勸醉天公。殘照一鞭去也。似看花走馬匆匆。當此際。餘霞映臉。減盡衰容。

又

孔西銘

邀月爲裳。牽風作珮。夏涼露沁水綃。薄羅帶垂幽意。絃語輕挑。携手桐陰月下。晚風生怯小蠻腰。湘簾裏。嬌羞半面。酒暈紅潮。愁也莫。憂也莫。夢裏得常聚也。笑勾

消勝如孤檠長夜。畫閣無聊。不羨神仙伴侶。碧雲深處。玉笙調。珊枕上。風流罪過。寫入芭蕉。

留客住 鷓鴣

曹實菴

瘴雲苦。徧五溪沙。明水碧。聲聲不斷。只勸行人休去。行人終古如織。正復何事。關卿頻寄語。空祠廢驛。便征衫濕盡。馬蹄難駐。風更雨。一髮中原。杳無望處。萬里炎荒。遞莫摧殘毛羽。記否越王宮殿。春女如花。祇今惟剩汝。子規聲續。想江深月黑。低頭臣甫。

夏初臨 懷覃九姪

沈融谷

蟋蟀窻前。枇杷樹下。碧窻倩画蟾紗。月杵秋砧。西溪一

舸移家。桂堂燈影霜華。舞闌珊。竹葉頻除。雙橋濃樹。烟迷古藤。誰數昏鴉。東陽瘦。日南道。愁時青松紅杏。詞句憐他。海棠未醒。白門又落楊花。魚尾殘霞。甚春閒燕子風斜。聽鳴笳。山程水程。離思無涯。

晝夜樂

孔西銘

東風不解吹春住。便值得將人誤。雖然花柳無情也。等天公忒妬。香餌魚腮吞又吐。想別有繫人腸處。江上片帆輕。只眼隨伊渡。百千愁緒憑誰訴。舊深盟忍辜負。任伊遊遍天涯。須把紅樓回顧。休道織縑人更好。便忘了辛勤織素。烟水惹閒雲。斷相思歸路。

孤鸞

梅

金介山

江南春早。奈紙帳孤眠。梅開偏少。欲折羞攀。驛使隴頭空到。如何天寒翠袖。怪春風剪勻芳草。似此無人愛玩。便不開也好。瘦花枝懶索巡簷笑。縱憔悴黃昏。只花知道。簾外霜風緊。聽玉笙吹小。尋常一宵落盡。直無情不憐人老。掉下半規缺月。冷清清同曉。

揚州慢

送史蓬菴之廣陵

陳其年

十里朱簾。半城畫槩。百年花月維揚。有君家丞相。梅嶺舊祠堂。每年到清明賽社。傾城士女。愁弄絲簧。只無情堤柳。舞腰還鬪宮粧。扁舟上塚。聽隣船重話興亡。奈

石馬嘶風。銀蠶弔月。往蹟全荒。我亦當年薄倖。曾吹過一帽紅香。問桃花認否。風前前度劉郎。

雲仙引

同趙恒夫農部宿虎丘

李分虎

短簿祠空。生公石冷。十年今日重登山。依舊路分明。驚心又添臺榭。難覓真娘墓。草青愁倚夕陽。雁繩風墮。螺髻烟凝。郎官載酒如澠。向刺菊殘。楓剪夜燈。吳舫歸時。偏留雙屐。別有閑情。醉後貪眠。窻明塔火。僧磬催詩。枕畔清。今宵佳處。閨亭人散。絃索無聲。

雙雙燕

孔振路

暮春時候。見翠剪紅襟。幾雙飛舞。柳梢花底。都是烏衣。

遊處領得繁香如許。不便向簾櫳偷度。呢喃相顧丁寧。
似惜韶光欲去。堪舉。差池振羽。纔過盡輕寒。又沾微
雨。掠花花落。戲蹴筵前無數。多少懷人意緒。似欲向深
閨頻訴。愁損少婦雙蛾。遙約凭欄細語。

催雪

黃以永

衾擁宵寒。翻盡冷灰。簷隙晶光透曉。聽戶外行人起來。
偏早。不是灞橋覓句。也跨個驢兒長安道。空教踏碎。龍
眠一幅。白畫花草。寒峭。阻登眺。看素紙南屏。半浮林
表。但有酒盈樽。便攄懷抱。得過而今且過。記昨夜枝頭
寒呼鳥。對凜冽遊興先闌。莫放山陰短棹。

倦尋芳又一體

味離邊牽牛花

孔西銘

清宵露泫。白晝弄涼。淡紫深青如許。柔蔓孤牽。不共羣
芳結侶。掛蘿墻。綠苔砌。最宜開向多陰處。是何人。強錫
佳名。唐突銀河織女。似驚聞牧童相喚。掩冉迷離。風
中競舉。老寄藩籬。頭角幾回塵土。好是碧天新過雨。映
成一色。柴窰古。正清妍。報秋深。被霜驅去。

玲瓏四犯

黃以永

午熱蒸衣。夜寒浸席。暮春節氣如許。便晴明天氣。已是
愁無數。何況淒風苦雨。異鄉身最難調護。杜宇殘紅。斜
陽芳草。盡是斷腸句。長堤柳。長安路。古今來慣把行

人擔誤。楊花撲面下。流水蕭蕭去。文章便擅雕龍美。辭
不得秋霜千縷。何似捲湘簾。並坐調鸚鵡。

燕山亭 落月

孔振路

蕉葉斜窓。風度疎櫺。鷄唱夢回時候。射角明河。掩映輕
雲。磊落曙星如豆。問夜何其。月掛在苑西高柳。知否。人
倚玉欄杆。未醒殘酒。長憶燭燼香殘。到此際。此時。猶
勸金斗。花明露重。犬吠金鈴。曾將履綦濕透。偏是今宵。
剩半面嫦娥相守。不久。歎嫦娥又沉楚岫。

又 櫞括歐陽子秋聲賦

顧天石

浙瀝奔騰。風雨乍驚。又似啣枚人馬。此是何聲。起視中

庭。月朗明河如瀉。童子何知。歐陽子曰。秋聲也。瀟灑。故
械。械淒淒。令人淚下。當此肅殺金商。想物老而悲。發
韻。喑啞。無情草木。不耐凋零。況我百憂難寫。要不星星。
除金石與吾同者。遙夜。但唧唧蛩吟遶舍。

陌上花 讀陳曾起柵園詞

孔振路

從來同調相憐。何必舊曾相識。片紙瑤華。便抵金聲。遙
擲。周情柳思。今何在。夢想江南詞客。恁多情。料與沈腰
同瘦。潘髻同白。似聞薄宦天涯。惟聽足。一派湘靈鼓
瑟。綺語閒愁。定寫鳳箋盈尺。焉知桂影芸窓下。咳唾有
人珍惜。把君詞。只笑當年。遇了竹山白石。

無悶

孔振路

緊自黃昏。不應更值。雨打梨花時節。奈攪亂愁魂。聲聲不歇。欲睡如何得睡。剛剩得殘缸半明滅。恰檢着昨夜寄來書信。鳳箋盈帙。重疊話又長。意又切。啞謎思量難徹。待將捲過。索性棄撇。爭奈閉上目睫。又髣髴娉婷。褰帷立。方信道不合多情。情多割不斷絕。

聒龍謔

白門歲除對雪

朱錫鬯

密比花繁。輕嫌絮重。一半斜侵簾戶。淡抹墻腰。似月稜初吐。纔飄墮凍雀聲中。又壓到早梅開處。縱旗亭臘醲堪酷。已迷却板橋路。颼風緊。亂雲低。見潑墨點點林

鴉催暮。一絲漁艇。料今番歸去。訝寒光入夜翻明。漸灑急聽窻如雨。問隔江桃葉桃根。尙能來否。

玉蝴蝶

烏江

顧天石

望去淡烟衰草。一灣渡口。舊日烏江。人怨騅嘶。猶動滿目悲涼。困彭城。雖沉霸氣。還江左尙足爲王。淚淋浪。英雄到此。謾說天亡。堪傷。江東父老。八千何在。三戶都荒。只有郵亭。舊江山擺滿斜陽。憶霸王。灞波欲泣。弔虞兮。花草猶香。駐孤航。閒評楚漢。一例茫茫。

金菊對芙蓉

螺磯弔孫夫人

曹實菴

蜀國夫人。孫郎小妹。腰間龍雀刀環。歎東南人物。弱女

登壇錦帆搖曳江如練。望瞿唐道路漫漫。永安龍去。蠶
叢夢杳。紅粉凋殘。靈澤遺廟江干。有雲車風馬。霧鬢
烟鬟。悵西風白帝。鸞馭難還。千尋鐵鎖沉江後。家何在
兩地悲酸。千帆落照。漁歌唱晚。露白楓丹。

又 西湖

毛鶴舫

烏桕開餘。黃花零後。斜陽目送賓鴻。正烟嵐深處。暫息
遊筇。憑高一色天連水。見飛來怪石玲瓏。西陵橋畔。蘭
舟畫舫。一葉盃中。喚起絕壑癡龍。把珠璣萬斛。洒向
池東。更碧筒徐引。曲折流通。家僮敲石燒茶竈。試新泉
蟹眼松風。歸來月下。回頭精舍。宵靜聞鐘。

御帶花

重九夜

成容若

晚秋却勝春天好。情在冷香深處。朱樓六扇小屏山。寂
寞幾分塵土。虬尾烟消人夢覺。碎蟲零杵。便強說歡娛。
總是無聊心緒。轉憶當年。消受盡皓腕紅萸。嫣然一
顧。如今何事。向禪榻茶烟。怕歌愁舞。玉粟寒生。且領畧
月明清露。歎此際淒涼。何必更滿城風雨。

垂楊

黃以永

隋堤春晚。舞東風萬縷。年年官道。送盡行人。樹頭依舊
青難了。寒烟深鎖紅墻悄。想曾帶建章殘照。向流水誰
話興亡。有流鶯聲鬧。春日章臺走馬。記親折路傍。隔

簾人笑。縱有長條。再來似舊應稀少。淒淒摠覺傷懷抱。
看搖落。漢南偏早。那教種樹人歸長不老。

高陽臺

拂水山莊感事

李武曾

屋背空青。墻腰斷綠。沙頭晚疊春船。一笛東風。斜陽淡
壓荒烟。尙書老去蒼涼甚。草堂西南渡明年。倚香奩。天
寶宮娥。愛說開元。松楸馬鬣都休問。恰土花深處。也
當新阡。白瓊紅巾。是非付與殘編。石家金谷曾拚墜。甚
遊人尙記生前。更淒然。燕又雙飛。柳又三眠。

又 章江舟次

宋牧仲

遠水拖藍。晴峯送翠。徐牽三板輕船。野岸風箏。撩人恰

是新年。垂楊不負東君約。裊鵝黃一色堪憐。更悠然。幾
處漁歌。幾點村烟。家山回首斜陽外。但萋萋芳草。森
森長川。十八灘遙。舟人指向鷗邊。紅牙慢拍王孫句。倚
篷窻。聊破愁眠。莫垂簾。尙有江梅。尙少啼鵲。

琵琶仙

黃以末

雙燕歸來。正池館。細雨梨花時節。門外芳草淒迷。紛紛
舞黃蝶。埋沒了紅橋別處。尋不出馬蹄車轍。暮靄平林。
斜陽遠樹。春晚臺闕。正目斷綠暗紅稀。更誰倚東風
弄橫鐵。眼見一林芳樹。做漫天飛雪。又添個黃昏杜宇。
絮叨叨似訴離別。若問多少啼痕。羅巾能說。

又中秋

成容若

碧海年年。試問取。冰輪爲誰圓缺。吹到一片秋香。清暉
了如雪。愁中看好天涼夜。爭知道盡成悲咽。隻影而今。
那堪重對。舊時明月。花徑裏幾捉迷藏。曾惹下蕭蕭
井梧葉。記否輕紈小扇。又幾番涼熱。祇落得填膺百感。
摠茫茫不關離別。一任紫玉無情。夜寒吹裂。

又送顧天石南歸

孔西銘

聚散無常。記不起。唱過陽關幾疊。廿載舊雨重論。肝腸
淨冰雪。爭忍向碧江秋冷。又生做一番離別。急管繁絃。
今宵席上。爲君嗚咽。須念我牢落文園。但好友如君

不多說。莫趁布帆風便。滯迢迢楚越。有無數垂垂敗柳。
向河干盡興攀折。送過濟水橋邊。半林黃葉。

念奴嬌

過綠柳長廊有感

梁蒼巖

滄泐南岸。憶當年綠柳。依依堪折。夾道長條張翠幄。清
影寒生六月。汗浥征衫。塵飛驛路。到此清涼別。今來駐
馬。濃陰一旦殘缺。聞道舊日隋堤。曾牽錦纜。空有蟬
聲咽。可惜長廊烟霧冷。一樣繁華消歇。莫問秋風。樹猶
如此。何況三千髮。長途搔首。愁聽枝上啼鴉。

又甲古

曹顧菴

南飛烏鵲。遶疎林三匝。無枝可寄。聊借遠遊扞骭髀。莫

似相如憔悴。山峙金焦。江來楚蜀。帆繫斜陽裏。中流擊楫。氣吞湖海千里。雙眼一望蒼茫。寒濤如箭。個個牙檣起。舊日精靈都已盡。何況堂前燕子。晉宋衣冠。陳隋宮寢。社鼓神鴉耳。佛狸祠下。怒濤空打遺壘。

又郭璞墓

宋荔裳

弘農太守。挽羲輪三舍。乃心王室。龜策如神。撩虜尾。臣命盡於今日。氣作長虹。魂歸華表。骨化金鰲脊。馮夷舞罷。數聲欵乃漁笛。安得溫嶠懷中。通天犀借我。下窺龍國。江左夷吾。今在否。石馬沉埋荆棘。鐵甕旌旗。金山鐘鼓。閱盡興亡迹。中泠滿酌。一帆高挂遙碧。

又紅橋韓園宴集

玉鈞斜畔。最傷心遊子。斷魂難續。佳麗繁華。誰領畧。惟有清狂杜牧。我輩重來。爲懽苦短。急辦三條燭。天寒木落。佳人同倚修竹。况乃詞客都豪。雍容車騎。落筆烟雲簇。樂莫樂兮。今夕會。莫學阮公癡哭。綠酒黃橙。銀箏翠袖。偷送初成目。矇矓別後。知他何處金屋。

又京口歸舟

嚴顥亭

江船烏榜。小揚州正值。早春時節。吹浪江豚。都未起。任我朗吟蘭楫。路指南徐。雲橫北固。十里輕帆截。金山晴了。蒜山猶帶殘雪。依舊樹影中流。鐘聲兩岸。風景真

清絕。狼石談兵何處是。歷歷舟人能說。劉尹荒廳。孫郎斷冢。搃被寒潮嚙。晚汀孤泊。玉龍誰叫霜月。

又于忠肅公祠

余淡心

小舟如葉。放中流。搖漾。一湖春水。古木豐碑。蒼蘚裂。碧血粼粼。猶泚。北狩南宮。西陵東市。搃爲君臣耳。杜鵑啼罷。有人歌哭于此。當日白骨青山。孤墳聳峙。石破驚山鬼。淚洒兩朝。冤少保。腸斷荒祠遺址。蘋藻盈杯。棠花滿地。欵帽斜陽裏。回帆日暮。汀鷗無數。翔起。

又聽雨

曹子清

濃烟肥草。怕春晴不穩。動迷巫峽。敲枕淋鈴。渾莫厭。還

有鳴駝嘈雜。六尺瓊墻。一檠紅淚。怎覓消愁法。和衣輾轉。南歸竟阻蝴蝶。忽憶細洒叢蕉。軟飄竹尾。啜喋萍池鴨。入手繁絃。淒又緊。戍鼓朦朧寒壓。昨日歌樓。今宵沙塞。隔斷鴛鴦扎。茫茫哀樂。夜中獨抱蓮匣。

又山間月

孔宏輿

峯巒萬古。儘經過多少。虧盈圓缺。三五良宵。蟾兔滿。一派寒光如雪。喬木參差。層岳歷落。照耀明千疊。松間石上。一般清興。難說。步向千尺峯頭。凌虛縱覽。如在金銀闕。一點初升。看漸小。方識雲山孤絕。白露橫空。寒梅遶澗。風景無差別。塵囂城市。何嘗見此清徹。

又 追和雲間陳徵君題余家遠閣

陳其年

得憐堂後。有丹樓飛起。當年爭羨。陽夏門庭能咏絮。那更溪山葱蒨。帶雨房櫺。和烟簾幕。零亂東湖面。碧闌干外。有人斜倚瓊扇。可惜人去匆匆。而今樓下。秋水帆如箭。我亦三吳好男子。綠髻忽然衰變。蔓草霜濃。叢祠烟鎖。白晝颺颺現。舍南舍北。亂飛王謝家燕。

又 弔屈原和東坡赤壁韻

孔振路

汨羅沉後。歎楚雖三戶。竟無人物。愛國忠君騷雅在。留取問天呵壁。杳杳東皇。冥冥山鬼。叫徹冤誰雪。武關西去。君王棄此英傑。此日酒設蒲樽。拈沉角黍。都爲君

而發。衆醉獨醒人不見。想像雲旗明滅。戰罷蛟龍。碧湖依舊。霽青山如髮。風生蘭杜。蕩波惟有新月。

又 忌辰感悼

青衫淚澁。笑離鸞別鵠。年經十五。大夢千秋常不醒。惟傍松楸朝暮。窓裏吟椒。庭前咏絮。往事難重數。畫圖輕展。一番一度悲楚。自歎不及梁鴻。難同奉倩。伉儷情空注。環珮珊珊來入夢。一點精靈何處。渺渺雲歸。茫茫鶴化。相望成終古。年年此日。酒澆原上寒樹。

又 周雪客汝南灣招集同諸子

沈融谷

研光小帽。舞山香一闕。落花如雨。顧曲當年銀蠟下。猶

記紅瑜金縷。東閣西園。芳樽誰老。細細羅窓語。六朝風景。小樓留得烟樹。門外那管驚濤。青衫白袷。把酒歌春暮。萬卷縹緗翻未足。明日抱琴歸去。舊好新知。紉蘭題葉。何事愁風絮。杜鵑聲裏。斷腸芳草南浦。

又 廢園有感

成容若

片紅飛滅。甚東風不語。只催漂泊。石上胭脂花上露。誰與画眉商畧。碧甃瓶沉。紫錢釵掩。雀踏金鈴索。韶華如夢。爲尋好夢。耽閣。又是金粉空梁。定巢燕子。一口香泥落。欲寫華箋憑寄與。多少心情難託。梅豆圓時。柳綿飄處。失記當初約。斜陽冉冉。斷魂分付殘角。

又 宿漢兒村

無情野火。趁西風燒遍。天涯芳草。榆塞重來冰雪裡。冷入髣髴吹老。牧馬長嘶。征笳亂動。併入愁懷抱。定知今夕。庾郎瘦損多少。便是腦滿腸肥。尙難消受。此荒烟落照。何況文園憔悴後。非復酒壚風調。回樂峯寒。受降城遠。夢向家山遶。迢迢百感。憑高惟有清嘯。

又 詠史

曹實菴

田光老矣。笑燕丹賓客。都無人物。馬角烏頭千載恨。七首匣中如雪。落日荒涼。羽聲慷慨。壯士衝冠髮。咄哉孺子。舞陽色怒而白。試問擊筑漸離。此時安在。何不同

車發。負劔祖龍驚掣袖。六尺屏風超越。貫日長虹。遶身
銅柱。天意留秦劫。蕭蕭易水。至今猶爲嗚咽。

又

出師二表。與殷盤周誥。同銘金石。臣本不求聞達者。爲
許先君破賊。瘴雨蠻江。秋風渭水。上將揮神筆。落星如
斗。熒熒火井將熄。今日丞相祠堂。黃鸝碧草。俯仰悲
陳迹。八陣圖邊波浪湧。遺恨譙周鬻國。一片降帆。千尋
鐵鎖。鼎足三分失。先生已矣。何能親見啣壁。

又 月夜登晴川閣

曹南耕

碧天明淨。正風吹木葉。一江寒水。攬入幾行寒雁。叫日

落亂帆如薺。歷歷晴川。萋萋芳草。鸚鵡洲猶是。行吟澤
畔。有人懷古深矣。西望大別山前。禹功疏鑿。遺廟千
秋峙。今夜月華看似鏡。隔岸笛聲初起。携取胡床。呼來
酒伴。醉倒南樓裏。庾公當日。想應風致如此。

又 宿針魚嘴

顧梁汾

幾行歸雁。共征帆落向。暮烟叢裏。野戍潮寒。清角動。簇
簇蒹葭深艤。酒旆微青。漁燈乍黑。未散沙洲市。當壚一
笑。滿頭黃菊旖旎。又是薄醉殘更。篷窗悶掩。轉淒迷
鄉思。誰與孤眠。欹枕說。妾夢不離江水。慈姥山高。望夫
磯冷。相對針魚嘴。斷魂今夜。風鬟雨鬢千里。

又惜別

顧天石

舊遊回首。問何年却是。再來時節。楓落寒江。秋氣冷。隔斷玉樓金闕。驛使皇華。篆翁釣艇。從此分吳越。昨宵猶自。一樽歌勸三疊。君意若肯憐余。將詩珍重。莫謾逢人說。柳七如今年已老。猶唱曉風殘月。似此江山。從來經過。多少人離別。不成真個。柳條不許重折。

又疊前韻有答

謝娘衰晚。算風情渾減。乍逢時節。幾度合歡。衾未煖。人去玉京瑤闕。縱使封侯。歸來人老。情意分胡越。芸牋錦字。空教寫恨重疊。爲問我未成名。卿猶未嫁。此句如

何說。惆悵青春能幾許。耽誤無邊風月。帽影鞭絲。茶烟禪榻。但管人離別。渭城休奏。蕭郎聽此心折。

東風第一枝

正月十九日夜汪蛟門喬石林二舍人置酒寓舍看燈上美人

李武曾

燈市人稀。酒旗風靜。上元時又過也。晚來一段閑愁。喜值舍人清暇。茗香初泛。更酒釀如渾。堪把看內家燈火。新詞題徧水晶簾下。縱頻醉禁中杯斝。問何似竹西亭榭。怪他池上春風。吹入異鄉今夜。蘭膏微閃。有紅粉翠蛾無價。歎年年遊子漂零。愁見碧綃圖畫。

又

孔西銘

一雨生涼。經旬無暑。今年秋意來早。碧梧未便露零。綠
蕉已任風掃。停揮紈扇。頻注目塔前芳草。看秋從甚處
潛生。夏向何方暗老。柳陰外風雲正好。蓼汀上浴沂
人少。團團捧出涼蟾。啞啞送來歸鳥。螢燈似豆。見籬角
弄光微小。歎恁時已自蕭疎。怎禁真個秋到。

渡江雲

寒夜登城聞笛

陳其年

孤城橫一片。千家樓閣。都在雁聲中。關河牢落甚。身世
飄零。烟水太空濛。舊時赤壁周郎少。正領艤。有許多
銀濤雪練。相映戰旗紅。江東誰携長笛。斜倚危欄。作
霜林數弄。總則把平生遺恨。訴與長空。一聲纔入梁州

破天風下掣入蛟宮。嗟橫竹。慎無滅沒爲龍。

又

江行自天門山之采石

蔣京少

青山遮不住。奔流直下。湧作海門濤。一帆雙黛掩。又是
荒烟。采石弔前朝。回頭六代繁華地。分付回潮。問金陵
埋金舊處。王氣幾全消。蕭蕭蘆花捲絮。雪浪拖銀。聽
漁歌環繞。喚閒愁。玉顏駿骨。一樣波漂。多情千古峨眉
月。夜臺伴李白牢騷。江山在。管教吟斷霜毫。

彩雲歸

孔西銘

瑤天鏡淨彩雲消。雨痕收。虹影如橋。捲疎簾數點山橫
翠。意外意有筆難描。渾疑是楚江巫峽。點湘娥黛。遙對

此茶烟細細香霧寥寥。無聊。枯枰戰罷。靜攤書冷似
僧寮。耳邊忽聞歸唱。依約想是漁樵。却羨伊水雲多處。
先得秋氣蕭條。爭如我春夢猶縈。悵憶鸞膠。

龍山會

訊史蘧菴歸自吳中

陳其年

颯沓梧宮葉。徧西風。又送人歸也。稻梁吳地儉。天外雁
揀盡寒汀空飛下。誰識故將軍。只亭尉偏工醉罵。王和
霸。銅仙月中如鉛淚瀉。剡曲興盡王猷。懶心情最聊
蕭難畫。買烟航兩艇。歸計穩。入口碧鱸紅鮓。我倚墊巾
樓。見君蒲帆恰卸。隔水榭。一尺釣絲相對把。

曲遊春

咏淚

孔振路

知否愁滋味。是苦從腸滴。酸向心起。畧泣青眸。便如泉
如露。涓涓不已。欲搵渾無計。多一半向隅偷墜。曉來掩
鏡臨粧。月中尙帶秋水。正自傷春未已。又轉瞬悲秋。
歡日無幾。惜別懷人。笑盡情沁入。眉梢眼底。摠把浮生
計。除對酒暫時忘耳。又怕興盡悲來。青衫易漬。

珍珠簾

賦得水晶簾下看梳頭

曹寶菴

雕房幾曲桐陰裏。金塘側。第一傾城殊麗。髮鬢照人明。
學遠山螺髻。蟬影花光相撩亂。襯一片芭蕉濃翠。清綺
更珊鈎犀押。冷波橫地。疑是月底初逢。被冰輪掩映。
織綃情思。宛轉玩瓊顏。倩曉風吹起。人在銀河清淺處。

倚白玉闌干如水。心醉。想道書慵把。幽懷旖旎。

又

顧梁汾

櫻桃宴罷人歸後。正烟籠澹月。疏窻如畫。紅藥欄邊。當日親携素手。睡起微聞花歎息。似記得。星星密咒。依舊對漂香泊粉。幾枝春瘦。不久心期輕負。為深憐痛惜。越增憊憊。十載綺羅情。付昨宵殘酒。誰道酒醒都是恨。只剗地曉風楊柳。知否。古今來一例。斷腸回首。

錦堂春慢

遊梳粧臺

毛鶴舫

晴雪初消。夕陽在樹。幽人相約扶筇。峭壁危橋。梅花淺亞房櫳。南渡幾何基業。此地却是離宮。想萬松嶺畔。王

氣當年鬱鬱葱葱。

樓頭梳掠雲鬢。正殘脂流膩。水漲

池紅。豈意臯亭戎馬。玉輦塵蒙。多少繁華消歇。搃付與暮梵晨鐘。何異開元往事。頭白宮人。共說元宗。

木蘭花慢

吳梅村

西湖花月地。櫻筍熟。鰕魚肥。記粉袖銀箏。青簾畫舫。烟柳春堤。驚風一朝吹散。歎西陵燈火。渡人稀。白髮龜年尚在。青山賀監重歸。恰相逢紫蟹黃鷄。猶唱縷金衣。柰狂客愁多。秋娘老去。木落烏栖。無情斷橋流水。把年光流盡。付斜暉。世事浮生急景。道人抱膝忘機。

又 中秋

水輪誰碾就。千尺起。嘯臺東。記白傅堤邊。庾公樓上。幾
度曾逢。今宵廣寒高處。問嫦娥環珮在何峯。天上銀河
珠斗。人間玉露金風。聽江樓鶴唳橫空。人影立梧桐。
有宮錦袍緋。綸巾頭白。鐵笛仙翁。欲乘月明飛去。過巖
城下界。打霜鐘。醉卧三山絕頂。倒看萬個長松。

又

龔芝麓

鏡中腸斷絕。愁萬種。不分明。正柳憶烏啼。雲迷馬角。惆
悵前生。東風恰吹恨到。又酸酸楚楚。兩眉橫。怪底檐花
如雨。杜鵑長是吞聲。昭陽粉黛記將迎。翠袖五銖輕。
忽淒笛吹霜。繁笳沸月。好夢難成。休言画工耕點。便淺

顰微笑也。心驚。慚愧紅塵斷梗。負他碧澗香羹。

又瀨上作

何省齋

長干逢小艇。乘興處。趁東風。只一領羊裘。一編蠹簡。一
隻鳩筇。偶來投金瀨上。聽荒城破寺。打霜鐘。仲叔蕭條
安邑。長卿慚愧臨邛。婆娑人影月明中。且閑數歸鴻。
看熱客稀疎。老兵生硬。醉袖龍鍾。不禁忽然長笑。把輕
身底事。作飛蓬。強酌官厨白酒。莫辜僧舍丹楓。

又聽雨

顧天石

天街燈火寂。小門巷。少人行。漸衰草叢邊。紙窻兒外。淅
淅零零。知他夜來變雪。柰黃昏猶作舊時聲。幾陣西風

到也。絲絲撲入疎櫺。客懷原自冷清清。傾耳若爲情。
想亂洒荒籬。斜侵古驛。半濕茅亭。江湖一般聽慣。美淒
涼。今夜最難聽。一點孤燈黯黯。滿頭華髮星星。

秋水 雨夜

成容若

誰道破愁須仗酒。酒醒後心翻碎。正香消翠被。隔簾驚
聽。那又是點點絲絲和淚。憶剪燭西窗小憩。嬌夢垂成。
頻喚覺一睚秋水。依舊亂蛩聲裏。短檠明滅。怎教人
睡。幾年踪跡。過頭風浪。只消受一段橫波花底。向擁髻
燈前提起。甚日還來。同領畧夜雨空階那滋味。

水龍吟

秋夜虎山橋醉月

吳留村

湖山清絕如斯。琉璃一片秋光皎。金梁百尺。玉波千頃。
翠屏圍繞。木落疎鐘。星搖巨壑。林幽風裊。有寥天唳鶴。
出羣鳴雁。乘夜色翔雲表。幾度傳觴把盞。醉蓬萊山
高月小。詞客哀時。騷人作賦。洞天清曉。隣笛驚秋。漁歌
激水。數聲縹渺。喜今宵相共。羃天席地。醉眠瑤草。

又 燕子磯

陸密菴

澄江點點殘霞。遙看昔日真人氣。偶來登眺。海天空濶。
下臨無地。江北江南。青山對面。晚雲如髻。向天公搔首。
驚人好句。索此處高吟耳。多少梁陳舊蹟。都付與斜
陽影裏。茫茫今古。有誰認得。臨春結綺。乘興而來。不堪

留戀早歸休矣。怕今朝石燕興亡感歎。欲凌風起。

又

毛稚黃

恍然夢影樓臺。花枝亂學宮腰舞。雲肩躡着。淡紅微綠。慊慊眉嫵。明月雕闌。好風襟袖。半飄香雨。自空梁燕別。春深不見。簾旌外。雙雙語。想得非關此世。飲瓊漿。夙曾邀取。如何一夜。樹頭樹底。殘英無主。光景流波。此身也是西陵坏土。只鍾情無奈。年華垂老。越添悽楚。

又 題舟中小像

周東會

人間塵海茫茫。驚濤濁浪連天表。道人見慣。高樓大艦。知他多少。送盡牢騷。牽成別恨。載將煩惱。只清晨鼓角。

黃昏更點。把地老天荒了。檢得滄浪清處。也何須十

洲三島。眼前常是。丹崖碧嶂。白蘋紅蓼。一葉雲深。一帆

風細。一絲烟裊。向空明擊楫。科頭箕踞。向江天笑。

又 送丁飛濤

許師六

故人萬里歸來。東山寺裏寒燈語。紛紛塞馬。茫茫槐蟻。飄風飛絮。不飲如何。會須作達。舊繁華處。奈白公亭子。三生石下。又早促蒲帆去。回憶燕支戰壘。魂消盡。撫今弔古。此行重問。扁舟明月。大江春樹。京口神鴉。吳門匹練。是君歸路。更相期握手。錢塘秋夜。看胥潮怒。

又 夜泊石鍾山

顧天石

水天雙插芙蓉碧。澄倒影。江關險。人言此際風濤相薄。
噌吰窵坎。似發鐘聲。蛟鼉吼怒。魚龍悽慘。但停舟夜聽。
月明頓覺。青天碎。星河淡。千古高懷誰似。老蘇髯酷。
耽遊覽。石鐘山記。搜奇抉勝。堪驚鬼膽。我覓遺文。殘碑
無剩。斷崖蒼。捫竒峯。空對秋容一嘯。又催解纜。

又 讀黃九以永遺詞有感

斯人也復云亡。世間少了填詞手。記得秋初。松陰石罅。
共啣卮酒。歸去無何。玉樓催賦。斷腸回首。歎錦囊詩句。
敲金戛玉。含淚誦君知否。想爲鍾情太甚。月難圓。花
難長久。自今無復。現身溫李。再來蘇柳。風雪鷄壇。烟霞

牛耳。竟成烏有。向杜陵池畔。添碑題作。詞人黃九。

又 春日送客過慈仁寺

曹寶菴

尋常彈指聲中。優曇偶現空王地。海棠着錦。丁香衣紫。
霞烘烟細。急管哀絃。青衫白袷。嬉春情味。嘆穠華電擲。
風流雲散。容易下中年淚。身是金閨倦客。賦渭城重
過蕭寺。倡條冶葉。笑人岑寂。樹猶如此。只有孤松似曾
扶我。當時沉醉。倩禪燈老衲。往來指點。說花榮悴。

又

黃以永

道傍十萬垂楊。風吹裊裊青無際。津亭把酒。回橋牽袂。
別離曾記。今日重來。冷烟疎雨。樹猶如此。把指尖劃損。

闌干倚徧。空目斷山橫翠。無限別離情思。悵紅橋一灣秋水。雁歸芳草。舟橫南浦。晚風又起。鬢影蕭騷。羅衣寒透。休文瘦矣。奈眼底眉頭。舊愁新恨。供人憔悴。

又次素菴感舊

閨秀徐燦

合歡花下流連。當時曾向君家道。悲懽轉眼花。還如夢。那能長好。真個而今。臺空花盡。亂烟荒草。歎一番風月。一番花柳。各自鬪春工巧。休歎花神去杳。有題花錦箋香稿。紅英舒卷。綠陰濃淡。對人猶笑。把酒微吟。譬如舊侶。夢中重到。請從今秉燭看花。切莫待花枝老。

憶舊遊

雨中賞牡丹

孔振路

正好花開徧。好雨知時。沾灑何妨。穀雨明朝是。把晚春芳意。全付花王。嬌憨倚闌欲語。風動錦仙裳。似秦虢三姨。華清浴罷。潤透紅粧。含香。近瑤席。又生受微寒。淺暈斜陽。萋芳辰難駐。夜遊須秉燭。爲照迷藏。若將人花比艷。畢竟讓花強。怕雨後悽然。東風一夜吹斷腸。

又

顧天石

歎心無方寸。淚只一泓。愁有千般。向歌樓舞榭。聽檀槽撥盡。別鵲離鸞。任教百事忘遍。難忘舊時歡。記翠袖雙籠。春纖對挽。一晌盤桓。無端。被名利。又催發蘭舟。話別河干。便深盟密語。千期和萬約。後會難圓。花房抱心

獨睡誰念蜜蜂寒。似露泣湘篁。東風無力吹不乾。

齊天樂 送仲兄之秣陵

林武宣

昨宵夢約江流住。今朝又還南浦。明夜孤舟。白蘋烟棹。醉月吟風何處。停杯不語。有訴盡離懷。幾聲杜宇。回首斜陽。青山流水帶人去。登高想君情緒。荒臺猶在否。烽塵難數。燕入烏衣。祇應笑問。當日夷吾何許。故宮禾黍。况衰草寒烟。天涯羈旅。何似歸來。小樓尋伴侶。

又 咏剪

孔振路

生來不惜機工苦。零星細裁文練。稱體春衫。宜人初服。待汝方施針線。尾分似燕。笑燕尾雖長。遜伊輕健。放下

玳然隔窻。知是繡初倦。雙雙並頭疊股。有金星一點。輾轉關鍵。未了鞋幫。半成裙袂。鎮日繡床相見。晚香庭院。也移入花叢。暗刪零亂。只有相思。料伊裁不斷。

又 蟬

朱錫鬯

苓根化就初無力。溫風便聞淒調。藕葉侵塘。槐花糝徑。吟得井梧秋到。一枝潛抱。任吹過鄰牆。餘音嫋嫋。驀地驚飛。金梭爲避栗留小。長堤翠陰十里。冠綉都不見。只喚遮了。斷柳亭邊。空山雨後。愁裡幾番斜照。黃昏暫悄。讓弔月啼蛄。號寒迷鳥。飲露方殘。曉涼嘶恁早。

又 蛙

顧天石

小池過雨添篙水。蒲根便聞喧鬪。剪綠爲衣。圈金作眼。忘却前身蚪斗。些須短脰。任勉學漁陽。終輸鼉吼。易得生嗔。腹肥翻令四肢瘦。先鳴不愆時候。爲求和上已。兩部齊奏。聒亂斜陽。絮殘涼月。多在白蘋紅藕。無心矢口。笑典午官私。問來何謬。怒勿當車。有人還式否。

又

陳曾起

尋常燕向雕梁語。今朝也成癡睡。但是雙栖。誰憐眼底。猶有人兒憔悴。春歸那裏。只幾點飛綿。一痕流水。獨自閑吟。夕陽闌角又重倚。按香曾與淺約。道芳菲可惜。休便輕棄。鏡裏青花。裙邊撲蝶。絕愛同心。梔子。驚飛兩

地。縱對酒當歌。了無情思。雨滴芭蕉。數聲驚夢起。

石州慢

顧梁汾

一月長河。奈望崎嶇。玉京難卽。滿身風露。篷窻潛啟。夜寒凝立。不如歸去。從教錦纜牙檣。釣絲莫負。秋江碧。何事訪支機。悔乘槎踪跡。淒絕。無端閱盡。水驛霜蕪。離亭風笛。只得幾行官柳。似曾相識。琵琶孤咽。那須月落回船。曲終始下香山泣。青髻待重看。有霜華堪織。

又任城觀女優

孔振路

嬾嬾婷婷。十二素蘭。花蕊齊發。唇脂競吐。眼波爭逗。芳心活潑。衣冠優孟。縱然立變鬚眉。腰肢原是娉婷質。雅

舞折旋間。想肌膚冰雪。清切紅么慢。撚白苧新腔。渭城三疊。正是風燈零亂。晚涼時節。爲他流盼。只愁顧殺周郎。蘇州刺史腸縈結。後夜捲瓊瑜。是誰家風月。

又

水落漁梁。蘋老汀洲。秋暮時節。遙山淡抹微雲。遠樹亂鳴黃葉。疎疎幾點。零亂天際歸鴻。依稀正似荆關筆。誰凭小闌干。望情人天末。幽咽數家砧杵。列戍悲笳。聽來偏切。渺渺愁余。何況經年離別。韶華易逝。又見白露爲霜。蒹葭凋盡寒江濶。猶自不相逢。受孤單風月。

珪花

朱錫鬯

日長院宇。針線慵拈。况倚闌無緒。翡翠幄。看盡展。忘却東風簾戶。芳魂搖漾。漸聽不分明鶯語。逗紅蕉葉底微涼。幾點綠天疎雨。畫屏遮遍。遙山知一縷。巫雲吹向何處。愁春未醒。定化作。鳳子尋香留住。相思人並料。此際驚回最苦。亟丁寧池上楊花。莫便枕邊飛去。

又雨

陳曾起

苔堦寒翠。滴損無端。儘閒門深閉。冥冥似夢。千萬縷。記了不堪重記。斜風吹去。漸響入芭蕉心裏。又亂他一片啼螿。引出斷腸秋意。已判破却工夫。任香冷薰籠。燈下愁倚。殘更捱盡。人倦也。又一聲聲驚起。枕邊偷數。可

還有未揮清淚。便夜來得與同聽。也只消魂無地。

氏州第一 和清真韻

丁飛濤

驛路斜陽。秋空似洗。一點楚天鴻小。短劍星塵。弊裘霜
裏。掩映落楓縹渺。馬怯危橋。疎髻影暗驚斜照。織錦空
成。恐教辜負。玉關人老。旅店鴉啼行跡少。昏樹裏疎
星猶遶。葦岸鷄聲。繩床蝶夢。都是閒愁抱。奈僕夫強解
事也。索向當壚調笑。酒薄難醒。月初斜。梧桐已曉。

又 登黃鶴樓謁呂仙像

顧天石

蠹漢危樓。江漢雄濶。俯看亂帆如薺。黃鶴去遙。白雲望
極。天畔朱欄誰倚。如此空濛境。只合仙翁獨睡。吹殘鐵

笛。醉了還醒。醒來又醉。暫過岳陽遊戲耳。更瞬息蒼
梧千里。物外滄桑。眼前蕉鹿。何預先生事。笑今人猶想
像。乞點石爲金一指。欲夢黃梁未成眠。荒鷄唱矣。

又

顧梁汾

生不封侯。拂衣垂老。尋思舊事悲咽。髀肉虛生。鬢絲全
減。閒却寶刀如雪。射虎歸來晚。又送柴門新月。對景婆
娑。濁醪未舉。唾壺先缺。多事陰符親授訣。再休訪穀
城黃石。少日偏疑。儒冠誤我。投却書生筆。笑從前都是
錯。纔過眼烟雲無迹。爭似滄江一叢翁。扁舟漁笛。

南浦

陳其年

成樓孤眺。莽秋容一片。畫難成。烟驛蕭蕭。易響。錯認是
風聲。却被沆瀣商氣。刮一天疎葉。舞空城。歎釣臺水榭。
千年遺址。菱蔓遶湖生。極望西山。蕭瑟。向楓林茶庵。
眼偏明。聞道樓船下瀨。十萬水犀橫。寄語魚龍。休夜嘯。
海門外。月上潮平。對碧梧紅蓼。暮烟殘照。不勝情。

又題元人蘆汀聚雁圖

嚴蓀友

生綃淡墨。向人心譜出許多愁。賸有垂楊金縷。幾葉下
寒流。隱隱漁燈生處。鎖瀟湘一派荻花秋。問賓鴻點點。
稻梁何在。生占白蘋洲。回首西風故國。有芙蓉塘外
月如鉤。應是千帆數盡。人倚隔江樓。此際離魂歸去。正

誰家水調唱歌頭。甚無情。圖畫烟中。不着一扁舟。

春從天上來

雁字

顧天石

北首賓鴻。又罷却。啣蘆直上排空。欲把歸意。箋問天公。
點點潑墨書濃。更欵斜連斷。如太古篆籀。魚蟲漸蠅頭。
迷人望眼。去入溟濛。何時足間繫帛。代屬國傳情。到
上林中。只恁堪題。千言萬語。邊塞寄恨無窮。問荒荒今
古。如此字曾幾回同。露函封。晚霞影裏。片片題紅。

春雲怨

寄粵東友人

查韜荒

紅綿小驛。記五羊城外。穿花雙屐。把手纔通名姓。一味
一觴如舊識。翠袖藏鈎。平頭搥扇。共指銀蟾。螭墻側。殘

拍逡巡。歸鞍酩酊。蠟淚滿離席。三珠坐上真奇絕。縱
年深路遠。珠江歷歷。對酒猶疑照顏色。橫浦樓船折盡
南枝。斷無消息。舊雨淋浪。曉星寥落。不喚奈何不得。

雨霖鈴

孔西銘

孤燈明滅。碧窓風細。小筵初歇。倚欄凝佇。夜景淒清。直
望水天遙接。僧寺晚鐘微度。被風引。嗚咽沁玉簾一枕
涼生。夢與烟波共寥濶。這回除了胸襟熱。又驀然感
動清秋節。思量那人別後。虛幾度半床涼月。露草螢燈。
空領受小院閒庭幽絕。剩把無限相思。付與寒螿說。

雙聲子

甲魯公項羽墓

孔振路

白楊衰草。卧牛坏土。不見霸氣崢嶸。重瞳初起。章邯新
破。王業曾此經營。而今寂寞荒塚上。野鳥悲鳴。蜀王一
樣魂化。欠他杜宇聲聲。想漢軍當日全得楚。殘山剩
水陰陵。誰懷舊主。嬰城不下。還仗我魯儒生。信絃歌遺
教。勝喑啞百萬雄兵。寒雲暮靄淒涼。祇令千古傷情。

又前題和振路儲公

顧天石

悲臺高聳。斜陽耕畔。霸主曾葬頭顱。陰陵道失。彭城戰
罷。誰念舊魯遺都。楚歌四面盡降漢。一劍魂孤。虞兮舞
化爲草。月明啼殺江鳥。想當日。便魯城不下。區區一
木難扶。絃歌困守。嬰城請葬。誰家血淚模糊。覽洙源泗

水何處着叱咤暗鳴。金天陵寢相望。共成萬頃荒蕪。



